




Senin, 09 Nopember 2020

Epesus 4: 22-24



Ndalani Situasi Si Mbaru



Sekalak anak perana, pendahinna erjuma. Enggo latih ia erdahin dengen enggo seh jamna guna mulih ku rumah. I bas perdalinen ku rumah, seh kal riahna ukurna sabap iingetna lit bajuna mbaru. Rembang ka malam minggu emaka rukur me anak perana enda guna make baju mbaru dengen reh ku rumah temanna/ rondongna. Tapi ban riahna ukurna make baju si mbaru ndai, piah la talangina bajuna si melket ndai. Lapiskenna saja, piah asum ia ndahi rumah temanna ndai lit bau la sedap, bau keringat. Emaka ingetna bas denga kap bajuna si melket ndai. Kepe labo jore lapiskan baju si melket ras baju si mbaru. Tentu sikapen min ndai tantangina lebe baju si melket guna make baju si mbaru.

Bage me pe i bas dirinta enda, labo jore lapiskan perbahanen si male/ melket si la ngena ate Dibata ras perbahanen si mehuli, bersih ras ngena ate Dibata. Emaka nina rasul Paulus i bas suratna “tangtangilah” dengen “pelimbaruilah” emaka “pakelah manusia si mbaru”. Enda lit 3 kata kerja aktif. Tangtangilah ertina tuhu-tuhu mulahi (melepaskan), kai si perlu ipulahi? Perbahanen-perbahanen si melket: erlua-lua, si nggesuhh, la meteh mela, nambah man berhala, erbahan ilmu sihir, si musuh, mecimberu, ras sidebanna (banci si oge Galati 5: 19-21). Pelimbarui sifatna terus menerus ndatken ulih si terulin asa si enggona. La pernah ngadi erbahan mehuli. Di kune sekali la rulih terusken saja, seh dungna pagi sempurna bas si mehuli. Make manusia si mbaru enda ertina enggo nggeluh bagi si ngena ate Dibata. Tep-tep wari kegeluhenta erdalan i bas Kata Dibata, Kata e si enggo engkuasai cara rukur, ngerana ras perbahanenta. Lanai sirang ras Dibata aminna se menit pe.

I bas ayat 24 isingetken mulihi kerna tempas Dibata (*imago Dei*) .*imago Dei is a golden seed which enables every people has the golden moment.* Iertiken: Segambar ras Dibata eme benih emas i ja teptep kalak ngaloken kesempatan emas guna encidahkan perbahanenna bagi si ni arapkan Dibata. Teptep kalak ibere Dibata biak si bali ras IA, erdahin alu ratur, mpekena-kena sekelewet gelah kerina jadi mehuli. I bas manusia e pe ibere kengasupen rukur mehuli, ietehna payo ras la payo si man bentasenna wari lepas wari. Ngasup engkelengi kalak si lit i sekelewetna ras engkelengi lingkungan inganna tading, seh maka kerina dame ras mejuah-juah.